

UMS catat rekod cipta biskut terpanjang di Malaysia

Oleh **SITI AISYAH NARUDIN**

bustymessy@gmail.com

KOTA KINABALU: Buat pertama kalinya, Universiti Malaysia Sabah berjaya mencipta sejarah mencatatkan rekod dalam Malaysia Book of Record dengan menghasilkan biskut terpanjang di Malaysia.

Biskut yang diberi nama Home Made Butter Cookies sepanjang 60 x 3 meter lebar itu direka dengan bentuk Jalur Gemilang yang mana ia mula disusun sejak 27 Julai lepas dan berakhir kelmarin.

Dengan menggunakan sebanyak 45,000 keping biskut dan kos berjumlah RM12,000, penghasilannya melibatkan lebih kurang 200 pelajar yang bertungkus-lumus selama 12 jam sehari demi menyiapkan biskut berkenaan.

Rekod menghasilkan biskut terpanjang ini merupakan antara

aktiviti di bawah Program Semarak Kemerdekaan (Semerka) 2010 anjuran bersama Jawatankuasa Kebajikan Mahasiswa (Jakmas) Kolej Anugerah Bestari dan Persatuan Mahasiswa Sekolah Sains Pemakanan dan Makanan (SSPM) UMS.

Antara bahan yang digunakan untuk menghasilkan biskut terpanjang ini termasuklah gandum seberat 436 kilogram (kg), marjerin 320 kg, gula 210 kg, telur 34,000 biji, vanila (RM356), serbuk penaik (RM75).

Menurut Timbalan Naib Canselor, Hal Ehwal Pelajar dan Alumni (HEPA), Prof Madya Dr. Kasim Md. Mansur, aktiviti sedemikian secara jelas menunjukkan motivasi dan komitmen para pelajar UMS dalam mencapai kejayaan.

“Saya amat kagum dan tergamam melihat hasil kerja para pelajar yang terlibat dalam menghasilkan

biskut terpanjang di Malaysia ini dan saya menganggap ia satu pencapaian yang luar biasa,” katanya.

Beliau berkata demikian ketika berucap merasmikan majlis penutupan Program Semerka 2010 di sini kelmarin. Turut hadir, Pemangku Pengetua Kolej Anugerah Bestari, Talib Abdullah Shani dan wakil daripada Malaysia Book of Record, Leona Paul.

Kassim turut berharap aktiviti seperti ini akan menjadi tradisi dan diteruskan pada masa akan datang memandangkan ia menunjukkan mahasiswa UMS sebagai mahasiswa yang berketrampilan.

“Selaras dengan gagasan 1Malaysia, usaha sebegini secara tidak langsung memperlihatkan integrasi nasional dalam kalangan mahasiswa seterusnya melonjakkan nama UMS ke peringkat yang lebih tinggi,” jelasnya.